



Inatsisartuni ilaasortaq Jess Svane

Siumut

/ maani

Illuut A/S pillugu § 37 naapertorlugu apeqquteqaammut akissut

Illuut A/S pillugu apeqqutinnut qujanaq, taamaalillunga Inatsisartuni ilaasortap Anthon Frederiksen-ip pineqartoq taanna pillugu § 37 naapertorlugu apeqqutaanut nr. 18-imut akissuteqaatinnut tapiliussinissannut periarfissarsivunga.

1. Illuut A/S inissiaataasa Agerskov Consulting-imut allaffissornikkut aqunneqarnerat qanoq periuseqarluni nuunneqarnera ingerlanneqarsimava?

AKISSUT: A/S Inissiaatileqatigiiffik INI-p (INI) nammineerluni inissianik, Illuut A/S-imit pigineqartunik allaffissornikkut aqutsinermut isumaqatigiissut atorunnaarsikkamiuk, INI Illuut-ip attartortittagaanut, INI-mit allaffissornikkut aqunneqartunut paasisutissat nuunneqarnissaannut piumassuseqarluarluni suleqataasimavoq.

2. Inatsisit suut toqqammavugalugit Illuut A/S inissiaataasa Agerskov Consulting-imut allaffissornikkut aqutassanngortinneqarpat?

AKISSUT: Pigisat nalillit pillugit inatsiseqarnermi isumaqatigiissutinut inatsisillu malillugit iliuuserisanut allanut inatsit, Inatsisartut nalunaarutaat nr. 781, 26. august 1996-imeersoq (isumaqatigiissusiortarnermut inatsit), aktianik piginneqatigiiffiit piginneqatigiiffiillu pillugit inatsit (Ingerlatseqatigiiffeqarnermut inatsit) aamma inissiaatileqatigiiffinnik pilersitsisarneq pillugu Inatsisartut peqqussutaat nr. 12, 28. oktober 1993-imeersoq, kingusinnerusukkut allannguuteqartinneqartoq (INI pillugu Inatsisartut peqqussutaat)´.

Ingerlatseqatigiiffeqarnermut inatsimmi allassimavoq, suliffeqarfiup isumannaatsumik aaqjissuunneqarnissaa siulersuisut isumagissagaat. INI-p Illuut-ip inissiaataanik aqutsinera isumannaatsumik ilusiligaanngilaq, allaffissornikkut aqutsinerup ilaani aningaasaqarnikkut annaasaqartoqarsinnaammat, taamaalillunilu Illuut annaasaqarsinnaammat.

Tamatumunnga iserternerni aninernilu misissuisarnerit naammaginanginnerat aammalu inissiat nalinginnaasumik iluarsaanneqartarnerisa naammanginnerat assersuutitut taaneqarsinnaapput. Tamatuma kingunerisaanik Illuut nalinginnaasumik iluarsaassinermut, attartortumit anisumit akilerneqartussaagaluartunik aningaasartuuteqartarpoq.

Kiisalu inissiat ataasiakkaat sivisuumik inoqanngittarput, tamannalu Illuut-mut ineqarnermut akiliutitigut toqqaannartumik annaasaqaataasarpoq.

INI pillugu Inatsisartut peqqussutaanni allassimavoq, INI Namminersorlutik Oqartussat sinnerlugit inissianik aqutsinermi suliassat isumagisussaagai, tassalu Namminersorlutik Oqartussat inissiaataannik attartortittakkanik allaffissornikkut aqutsisussaavoq, ingerlatsisussaavoq aserfallatsaaliuisussaallunilu. Aamma allassimavoq, Namminersorlutik Oqartussat inissiaataannik ingerlatsinerup saniatigut suliassat isumagineqarnissaannut Ingerlatseqatigiiffimmu akiliutit niuerneramik tunngaveqarluni ingerlatsinermut atorneqartussaasut, suliassat taamaattumik

Den 1. juni 2015
Sagsnr. 2015-115211
Dok. Nr. 1977890

Postboks 909
3900 Nuuk
Tlf. (+299) 34 50 00
Fax: (+299) 32 52 86
E-mail: isan@nanoq.gl
www.naalakkersuisut.gl

isertitaqaataasussaammata. INI-mit ilisimatitsissutigineqarpoq, Illuut-ip inissiaataannik aqutsineq isertitaqaataasannigitoq. Taamaattumik aamma INI-p peqqussut naapertorlugu Illuut-ip inissiaataannik attartortunut aqutsinermut akiliutinik qaffaanissaa imaluunniit aqutsinermik unitsitsinissaa pisariaqarsimavoq. Pissusiviusut tunngavigalugit Namminersorlutik Oqartussat inissiaataannik attartortut allat INI-p Illuut-ip inissiaataannik aqutsineranut "akileeqaataasarsimapput".

3. Illuut A/S siulersuisui – Namminersorlutik oqartussaneersut atorfilittat – Naalakkersuisunut akuersissummik piniaqqaarsimappat inissiaatit allaffissornikkut aqunneqarnerat Agerskov Consulting-imut nuutsinnagit?

AKISSUT: Naalakkersuisut Aktianik Piginneqatigiiffimmik Illuut-mik piginnittutut aalajangiineq pillugu ilisimatinneqarput.

4. Illuut A/S-ip Namminersorlutik oqartussat illuutaannik allaffissornikkut aqunneqarnissaannut piunasaqaatit inatsisit atuuttuni allassimasut najoqqutaralugit Agerskov Consulting-imut nuunneqarpat?

AKISSUT: Aap. Aammattaaq apeqqut 2-mut akissut takuuk.

5. Illuut A/S inissiaataannik allaffissornikkut aqutsinissamik Agerskov Consulting-imut tunniussinermi, sanaartornermi neqeroortitsisarneq pillugu inatsisartut inatsisaat aamma/imaluunniit nioqqutissanik sullissinermillu pisiniarnermi kaajallaasitaq Namminersorlutik suliffeqarfiutaannullu atuuttoq najoqqutaralugu tunniunneqarpat?

AKISSUT: Sanaartornermi neqerooruteqartitsisarneq pillugu Inatsisartut inatsisaat nr. 11, 2. december 2009-imeersoq sanaartugassanut tunngasuvoq. Inatsisartut inatsisaat taanna allaffissornikkut aqutsinermut siunnersuisarnermullu atuutinngilaq, taamaattumillu Illuut-ip inissiaataasa aqunneqarnerinut sunniuteqartussaannani. Kiisalu ilisimatitsissutigineqarsinnaavoq, Illuut-ip sanaartugassaatai tamarmik sanaartornermi neqerooruteqartitsisarneq pillugu Inatsisartut inatsisaat nr. 11, 2. december 2009-imeersoq naapertorlugu neqerooruteqartitsivigineqartussaammata.

Namminersorlutik Oqartussat qitiusumik allaffeqarfiani sullissivinnilu taassuma ataaniittuni nioqqutissanik sullissinernillu pisinermut Namminersorlutik Oqartussat kaajallaasitaat Namminersorlutik Oqartussat ingerlatsinermut immikkoortortaqarfiinut atuuppoq, tassani pineqaratik,

- suliffeqarfiit imminnut ingerlattut,
- Inatsisartut Siulittaasoqarfiat, kiisalu
- KNR.

Illuut kaajallaasitamut tassunga ilaatinneqanngilaq, taamatuttaarlu ingerlatseqatigiiffiit Namminersorlutik Oqartussanit pigineqartut allat ilaatinneqaratik..

6. Illuut A/S inissiaataasa allaffissornikkut aqunneqarneranut suut piunasaqaatit tunngavigalugit Agerskov Consulting-imut nuunneqarpat?

AKISSUT: Apeqqut 2-mut akissummi aammalu Anthon Frederiksenip § 37 naapertorlugu apeqqutaanut nr. 118-imut akissummi innersuukkusutannut allassimasutut, INI-p Illuut-ip inissiaataannik aqutsinera INI-mut aamma Illuut-mut unammillernartuusimavoq.

Illuutillit peqatigiiffiinik aqutsineq attartukkamut ataatsimut ukiumut 1.500 koruunit missaannik akeqarpoq, tassungalu INI-llu attartortittakkamut ataatsimut aqutsinermut akigititai 3.995 koruuniusut ilanngunneqassapput. Tassalu attartukkamut ataatsimut, INI-mit aqunneqartumut aqutsinermut aningaasartuutit katillugit ukiumut 5.495 koruuniupput. Agerskov-ip aqutsineranut attartukkamut ataatsimut akiusut katillugit

4.400 koruuniupput, taamaalillunilu attartukkamut ataatsimut ukiumut sipaagassat 1.095 koruuniupput.

Inissianik aqutsinermik Agerskov Cosulting-imut tunniussinermut tunngavigineqartoq pingaarutilik tassaavoq, attartortittakkat illuutillilu peqatigiiffiik aqutsinerup ataatsimoortinneqarneri.

Aqutsinermik ataatsimoortitsinermi pissarsiassat saniatigut pissarsiarineqartussa q tassaavoq, aningaasartuutaalerumaartussat erngerlutik ilisimaneqalernissaat, aammalu Illuut-ip aningaasartuutissanik, amerlassusiinik ilisimasaqarfioreersinnaanngitsunik iluarsiinissamut sivisuumik utaqqisariaqarunnaarnera. INI-p aqutsinera ingerlaannassagaluarpat, tamanna ukiumoortumik naatsorsutinik saqqummiussisarnermi nalorninermik kinguneqartussaavoq, taamaalillunilu Realkreditimik taarsigassarsiniartarfinit aningaaserivinnillu taarsigassarsinissamut periarfissat sunnerneqartussaallutik.

Kiisalu aamma erseqqissaatigineqassaaq, Illut-ip kukkunersuisua, Kukkunersuiisoqarfik Naalagaaffimmit Akuerisaq Deloitte, 2013-imut ukiumoortumik naatsorsuutinik kukkunersuiinermi allattaavimmut imatut allassimammatt: *"Ukiup siuliani pisutut ingerlatseqatigiiffiup aqutsinerata killeqarnerani amigaatit ulorianartorsiorfiusinnaasullu eqqumaffigeqqussavagut. [...] Matuma siuliani allassimasut tunngavigalugit inassutigissavarput, ingerlatseqatigiiffik Illuut-itut angissusilik annertussusillilu, ingerlatsinermut immikkoortorta qarfilimmik aamma naatsorsuusiornermut immikkoortorta qarfilimmik, ulluinnarni suleqatigiittunik aqutsisoqartariaqarmat. "*

Naliliinera malillugu aqutsisut ataatsimoortinneqarnissaannik kukkunersuisup inassuteqaataata anguneqarnissaa alloriarnerussaaq siulleq,

7. Agerskov Consulting siusinnerusukkut sanaartornerup iluani suliaqareersimava aamma/imaluunniit illuutinik allaffissornikkut Namminersorlutik oqartussat sinnerlugit suliaqareersimava, taamaassimappat suliassat suut pineqarpat, qanorlu annertutigisimappat?

AKISSUT: Agerskov Consulting siusinnerusukkut Illuut-ip attartortittagaasa ilaanik INI-mut tunniunneqarnissaat sioqqullugu aqutsisuusimavoq.

Kiisalu Agerskov Consulting illuutini, "attartortumiit piginnittumut" aqqissuussineq naaperotrlugu allannortinneqarsimasuni, aammalu illuutillit peqatigiiffiik namminersortunik peqartuni "attartortut sinnerinik" aqutsisuvoq. Illuutillit peqatigiiffiisa namminersortut siulersuisui aqutsisumik toqqaasarnermi aalajangiisuusarput.

--oo0oo--

Naggasiutigalugu oqaatigissavara, A/S Inissiaatileqatigiiffik INI-p Namminersorlutik Oqartussat inissiaataannik attartortittakkanik nuna tamakkerlugu iluarsaassinissamut suliniutissat pilersarusiornissaannut suliarinissaannullu, Namminersorlutik Oqartussat iluarsaassinermut allattoqarfia suleqatigalugu sulinermini eqqissisimatinneqarnissamut pisariaqartitaminik periarfissinneqarnissaa pingaartikkakku eqqornerpaatullu isigalugu. Tamatumalu peqatigisaanik kukkunersuisup inassuteqaatai naapertorlugit Illuut-ip inissiaataasa aqunneqarnerinik ataatsimoortitsinissaq ersarissumillu aqutsinermik pilersitsinissaq pingaartippara.

Inussiarnersumik inuulluaqqusillunga

Knud Kristiansen